

ԱԿԱԴԵՄԻԿՈՍ ԼԵՎՈՆ ԱՐԳԱՐԻ ՕՐԲԵԼԻ
(Ծննդյան 80-ամյակի առթիվ)

Հուլիսի 7-ին լրանում է մեր երկրի ականավոր գիտնական, համաշխարհային ֆիզիոլոգիական գիտություն խոշոր ներկայացուցիչ ակադեմիկոս Լևոն Արգարի Օրբելու ծննդյան 80 տարին: Լ. Ա. Օրբելու անունը հայտնի է ոչ միայն գիտական շրջաններին, այլև մեր հայրենիքի ժողովրդական լայն մասսաներին:

Դեռ ուսանողական տարիներին Լ. Ա. Օրբելին հաստատապես որոշեց աշխատել Իվան Պետրովիչ Պավլովի մոտ, որի վեհությունն անշնչելի ազդեցություն էր գործում Ռազմա-բժշկական Ակադեմիայի երիտասարդ ունկնդիրների վրա: Լ. Ա. Օրբելին իր բախտը անքակտելիորեն կապում է Ի. Պ. Պավլովի բախտի հետ և Ռազմա-բժշկական Ակադեմիան ավարտելուց հետո՝ 1904 թ. նա դառնում է իր հանձարեղ ուսուցչի աշխատակիցը և ամենամերձավոր օգնականը:

Գիտական գործունեությունը Լ. Ա. Օրբելին սկսեց այն տարիներին, երբ մեծ Պավլովի լաբորատորիաների հեղափոխական վազքը նախագուշակում էր ուսական ֆիզիոլոգիական գիտության աննախընթաց ծաղկում: Այստեղ՝ Ի. Պ. Պավլովի լաբորատորիաներում՝ խմորվում է նրա միտքը, որով հետագայում որոշվում է նրա ստեղծագործական որոնումների ամբողջ ուղին: Լ. Ա. Օրբելին հանդիսանում է Ի. Պ. Պավլովի հետևողական աշակերտը: Նրա ամբողջ գիտական գործունեությունը ներկայացնում է հանձարեղ ֆիզիոլոգի բազմակողմանի գիտական ժառանգության հետագա ստեղծագործական զարգացումը:

Լ. Ա. Օրբելու կարևորագույն հայտնագործություններից մեկը — սիմպատիկ ներվային սիստեմի ադապտացիոն-տրոֆիկ դերի մասին ուսմունքը, որն ընդհանուր ճանաչում է գտել և հայրենական ֆիզիոլոգիայի ներդրումներից է համաշխարհային գիտության մեջ, իր արմատներով սերտորեն կապված է տրոֆիկ ներվավորման մասին Ի. Պ. Պավլովի ուսմունքի հետ:

Այդ հայտնագործության պատմության համար բնորոշ եղավ աշխատանքի հատուկ ոճը՝ մինչև սիմպատիկ ներվային սիստեմի ֆիզիոլոգիայի մշակումն սկսելը, Լ. Ա. Օրբելին իր ուսմունքը հիմնավորեց տեսականորեն: Լաբորատորիայում ստացված հենց առաջին փաստերը հաստատեցին նրա հայացքները, իսկ հետագա փորձերը հարստացրին սկզբնական տեսությունը, որի հետևանքով ծագեց սիմպատիկ ներվային սիստեմի ունիվերսալ ադապտացիոն-տրոֆիկ դերի մասին ուսմունքը: Այդ ուսմունքն ընդգրկում է հսկայական թվով փաստեր, որոնք վերաբերվում են կմախքային մկանի, կենտրոնական ներվային սիստեմի, ռեցեպտորների և այլ օրգանների վրա սիմպատիկ ներվային սիստեմի ազդեցության տարբեր կողմերին:

Բնական տաղանդից բացի, որով օժտված էր Լ. Ա. Օրբելին, պրոբլեմի լայն ընդգրկումը հնարավոր եղավ համաշխարհային ֆիզիոլոգիական գիտության նվաճումներին քաջգիտակ լինելու շնորհիվ:

Լ. Ա. Օրբելին պատկանում է ֆիզիոլոգների հին դպրոցի այն փայլուն

համաստեղությանը, որոնք աչքի էին ընկնում ֆիզիոլոգիայի հիմնական բոլոր բաժիններն ընդգրկող գիտելիքների էնցիկլոպեդիական ծավալով:

Օժտված լինելով գիտելիքների բացառիկ լայնությամբ, Լ. Ա. Օրբելին իր լաբորատորիաներում մշակում է ֆիզիոլոգիայի տարբեր պրոբլեմներ: Բայց նրա աշխատանքների ուղղություններից մեկը աչքի է ընկնում իր հատուկ նշանակությամբ: Խոսքը էվոլյուցիոն ֆիզիոլոգիայի մասին է, որը կապված է Լ. Ա. Օրբելու անվան հետ:

Ֆունկցիաների էվոլյուցիայի հարցերը Լ. Ա. Օրբելին սկսեց մշակել գրեթե սիմպատիկ ներվային սիստեմի ֆիզիոլոգիայի հետ միասին: Առաջին հերթին նրանք վերաբերվում էին շարժողական ապարատի էվոլյուցիային: Այդ ուսումնասիրությունները բազմամյա փորձերի նպատակասլացության և խիստ տրամաբանականության փայլուն օրինակ հանդիսացան:

Լ. Ա. Օրբելու բազմաթիվ աշխատակիցների կողմից ստացված փաստերը թույլ տվեցին նրան ձևակերպելու էվոլյուցիոն ֆիզիոլոգիայի հիմնական օրինաչափություններից մեկը, որն ունի համակենսաբանական նշանակություն. կենդանական օրգանիզմի պատմական և օնոգենետիկ զարգացման պրոցեսում նոր ֆունկցիոնալ հարաբերությունները կառուցվում են հների բազայի վրա, «շերտապատում» են նրանց: Ընդ որում, որոշ պայմաններում՝ մասնավորապես փորձի ժամանակ, կամ պաթոլոգիկ դրության զարգացման դեպքում՝ այդ «հին» ֆունկցիոնալ հարաբերությունները կարող են նորից ի հայտ գալ կամ անգամ դառնալ գործունեության գերիշխող ձևեր: Այդ ընդհանրացումն ամբողջովին ներդաշնակում է Ի. Պ. Պավլովի ժամանակավոր կապերի մասին ուսմունքին և արտացոլում է նրա հայացքները՝ ձեռքբերովի հատկանիշների ժառանգաբար փոխանցման վերաբերյալ:

Լ. Ա. Օրբելու էվոլյուցիոն գաղափարները բարերար ազդեցություն ունեցան Սովետական Միությունում ֆիզիոլոգիական գիտության մեջ մի շարք ուղղությունների զարգացման վրա, մասնավորապես էմբրիոֆիզիոլոգիայի, հասակային ֆիզիոլոգիայի և այլն:

Փայլուն էքսպերիմենտատորի վարպետությունը նրա մոտ զուգակցվում էր խոր տեսական մտածողության հետ, և դա թույլ էր տալիս նրան փորձում նկատելու այն, ինչ վրիպում էր ուրիշների ուշադրությունից, և ընդհանրացնելու իր դիտողությունները պարզորոշ և հասկանալի դրույթներով: Հարյուրավոր հետազոտողներ զբաղվել են մինչև Լ. Ա. Օրբելին ուղեղիկի ուսումնասիրությամբ, սակայն հետևությունները, որոնց նա հանգեց իր դիտողություններից ելնելով, արմատապես տարբերվում էին այն բոլորից, ինչ գոյություն ունեւ ֆիզիոլոգիայի այդ բնագավառում: Այսպես, Լ. Ա. Օրբելին ստեղծեց իր ուսմունքը ուղեղիկի ֆունկցիաների մասին, որով նա հաստատում էր սերտ փոխազդեցության առկայությունն ուղեղիկի և աֆերենտ սիստեմների ու սիմպատիկ ներվային սիստեմի միջև: Ուղեղիկի ֆիզիոլոգիայի ամբողջ հետազա զարգացումը հանդիսացավ Լ. Ա. Օրբելու գաղափարների փայլուն ապացույցը:

Լ. Ա. Օրբելու մահից հետո վերը նշված պրոբլեմների մշակմանը մասնակից դարձավ նաև Հայկական ՍՍՌ Գիտությունների ակադեմիայի ֆիզիոլոգիայի ինստիտուտը, որին շնորհվեց ականավոր ֆիզիոլոգի անունը:

Պետք է առանձնաբար նշվեն Լ. Ա. Օրբելու ծառայություններն ուղեղի գործունեության բարձրագույն արտահայտությունների ուսումնասիրման հարցերում ճիշտ դիրքավորումը պաշտպանելու գործում: Չնայած անհիմն ու դաժան

քննադատությանը, որի հեղինակները՝ Ի. Պ. Պավլովի աշակերտներից ոմանք՝ իրենց համարում էին նրա ուսմունքի մոնոպոլ մեկնաբաններ, Լ. Ա. Օրբելին հաստատորեն կանգնած էր իր դիրքերում և անդադար կրկնում էր, որ ի տարբերություն կենդանիների՝ մարդու բարձրագույն ներվային գործունեության ուսումնասիրության դեպքում հետազոտողը բացի օբյեկտիվ տվյալներից պարտավոր է ի նկատի ունենալու նաև մարդու սուբյեկտիվ ցուցումները:

Ծավալով սահմանափակված հոգվածում դժվար է անգամ սեղմ կերպով անդրադառնալ այն բոլոր պրոբլեմներին և ուղղություններին, որոնք մշակվել են Լ. Ա. Օրբելու ղեկավարությամբ: Բացի նշվածներից, նրա ուսումնասիրություններում նշանավոր տեղ են գրավում բարձրագույն ներվային գործունեության, զգայարանների, ֆիզիոլոգիական ցավի, ավիացիոն և ծովային ֆիզիոլոգիայի պրոբլեմները:

Աշխատանքի այս բոլոր բնագավառներում Լ. Ա. Օրբելին իր աշխատակիցների հետ միասին, բազմաթիվ փաստերից բացի, տվեց գիտությանը նոր, օրիգինալ գաղափարներ և ընդհանրացումներ, որոնք բնորոշվում են տեսական մտքի հստակությամբ, պարզությամբ և խորությամբ:

Լ. Ա. Օրբելին հսկայական ազդեցություն ունեցավ հայրենական ֆիզիոլոգիայի զարգացման վրա: Բավական է հիշեցնել, որ էվոլյուցիոն ֆիզիոլոգիայի բազմակողմանի զարգացումը գնում է Լ. Ա. Օրբելու կողմից կանխագծված ուղիներով: Նրա անվան հետ է կապված զգայարանների ֆիզիոլոգիայի զարգացումը: Անգնահատելի ավանդ նա մուծեց Սովետական Բանակին, ավիացիային և նավատորմին հետաքրքրող ֆիզիոլոգիական պրոբլեմների ուսումնասիրության կազմակերպման գործում:

Սովետական հասարակայնությունը հանձինս Լ. Ա. Օրբելու մեծարում է ոչ միայն ականավոր գիտնականի և սովետական գիտության կազմակերպչի, այլև անխոնջ հասարակական գործչի, որը, հետևելով դեմոկրատ գիտնականների տրադիցիաներին, սիրով հաղորդում էր իր գիտելիքները ժողովրդական մասսաներին:

Իհնելով խոշոր գիտական կոլեկտիվների ղեկավար և շնայած հսկայական աշխատանքին՝ իր աշակերտների և աշխատակիցների ղեկավարման և կոնսուլտացիայի գծով, Լ. Ա. Օրբելին միշտ ժամանակ էր գտնում ունկնդրելու տարբեր տեղերից և ռեսպուբլիկաններից իրեն խորհուրդը հայցող երիտասարդ գիտնականներին, կարդալու գիտա-պոպուլյար զեկուցումներ, շատ ալլ հանդիպումների համար՝ բանվորների, ծառայողների, սովորողների և զինվորականների հետ: Ըստ որում Լ. Ա. Օրբելու համար բնորոշն այն է, որ նա չէր սահմանազատվում սկսնակ, երիտասարդ աշխատակիցներից լաբորատորային խոշրնդոտներով կամ վկայակոչելով իր ծանրաբեռնվածությունը: Ի տարբերություն շատերի, Լ. Ա. Օրբելին միշտ իրազեկ էր իր բոլոր աշխատակիցների գործին, կրտսերներից սկսած վերջացրած ղեկավարներով, և միշտ ժամանակ էր գտնում նրանցից յուրաքանչյուրի հետ առանձին զրուցելու: Այդ գործում նրան օգնում էր բացառիկ աշխատունակությունը, որը թվում է թե սահման չուներ:

Լ. Ա. Օրբելին հանդիսանում էր ՍՍՌՄ Գիտությունների ակադեմիայի և Հայկական ՍՍՌ Գիտությունների ակադեմիայի իսկական անդամ, Փարիզի կենսաբանական ընկերության թղթակից-անդամ, Բնախոյզների համագերմանական Լեոպոլդինո-Կարոլինյան ակադեմիայի անդամ, Մեծ Բրիտանիայի

Ֆիզիոլոգների ընկերության անդամ: Նշված գիտական կազմակերպություններում նրան ընտրելը հանդիսանում էր Լ. Ա. Օրբելու համաշխարհային գիտությանը մատուցած ծառայությունների արտահայտությունը:

Հայրենիքին և գիտությանը մատուցած ծառայությունների համար ակադեմիկոս Լ. Ա. Օրբելին Կառավարության կողմից արժանացել է Սոցիալիստական աշխատանքի հերոսի կոչմանը, պարգևատրվել է Լենինի շորս շքանշաններով, Կարմիր Դրոշ շքանշանով, Աշխատանքային Կարմիր Դրոշ շքանշանով, Կարմիր Աստղ շքանշանով և մեդալներով:

Լ. Ա. Օրբելին մասնակցել է Հայաստանի 25-ամյակին նվիրված տոնակատարությանը: Նա միշտ սիրով էր հիշում Հայաստանը և շատ անգամ է ցանկություն հայտնել նորից այցելելու Հայաստան: Իր կյանքի մայրամուտին, երբ ծանր հիվանդությունը գամել էր նրան անկողնուն, Հայաստանի մասին խոսելիս նա հաճախ կրկնել է—երբ առողջանամ անպայման մեկնելու եմ Հայաստան: Ցավոք սրտի, Լևոն Աբգարիչի այդ իղձը չիրագործվեց: